



CONVENIO DE COLABORACIÓN ENTRE A AXENCIA PARA A MODERNIZACIÓN TECNOLÓXICA DE GALICIA E O INSTITUTO GALEGO DE ESTATÍSTICA PARA OPTIMIZAR AS ESTATÍSTICAS NO ÁMBITO DA SOCIEDADE DA INFORMACIÓN

Dunha parte, Julián Cerviño Iglesia, director da Axencia para a Modernización Tecnolóxica de Galicia, actuando en nome e representación da dita Axencia, en virtude das facultades conferidas polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (Cixtec) e se modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos e polo Decreto 149/2022, do 1 de setembro, polo que se nomea director da Axencia para a Modernización Tecnolóxica de Galicia.

Doutra parte, José Antonio Campo Andión, Director do Instituto Galego de Estatística (en adiante IGE), nomeado por Decreto 295/2009, do 14 maio, e de acordo coas facultades que se lle outorgan na Lei 9/1988, do 19 de xullo, de estatística de Galicia e no Decreto 60/2016, do 26 de maio, polo que se aproba o estatuto do IGE.

As partes comparecentes recoñécense reciprocamente capacidade suficiente para outorgar o presente convenio e

EXPOÑEN

Primeiro. A Axencia para a Modernización Tecnolóxica de Galicia (en adiante Amtega) é unha axencia pública autonómica encadrada nas entidades instrumentais do sector público autonómico reguladas no título III da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, tal e como se recolle no Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (Cixtec) e se modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, e no que se regula tanto as súas competencias e funcións como a súa organización e estrutura, o réxime do seu persoal, o réxime económico-financiero e patrimonial, así como os principios que a orientarán na súa actuación.

A AMTEGA, adscrita á Consellería de Facenda e Administración Pública, é responsable de executar a operación estatística "Galicia dixital: sistema de indicadores", consolidada na Lei 16/2021, do 20 de decembro, do Plan galego de estatística 2022-2026 e incluída nos decretos dos programas anuais que a desenvolven, e faino a través do Observatorio da Sociedade da Información e a Modernización de Galicia (en adiante OSIMGA), creado por Decreto 21/2010, do 4 de febreiro, modificado por Decreto 57/2013, do 11 de abril, e adscrito á AMTEGA pola disposición adicional décima do Decreto 252/2011, do 15 de decembro.

O obxectivo deste sistema de indicadores é recoller todas as variables relevantes para analizar a repercusión das medidas adoptadas sobre tecnoloxías da información e da comunicación nos ámbitos dos fogares, das empresas e das administracións. A este obxectivo súmase o de colaborar para xerar información estatística sobre ciberseguridade nas empresas.

Segundo. De acordo coa Lei 9/1988, do 19 de xullo, de estatística de Galicia, a Lei 16/2010, do 17 de decembro, de organización e funcionamento da administración xeral e do sector público autonómico de Galicia e Decreto 60/2016, do 26 de maio, polo que se aproba o





Estatuto do IGE, IGE é un organismo adscrito á Consellería de Facenda e Administración Pública cuxa finalidade é dirixir e coordinar a actividade estatística no ámbito competencial da Comunidade Autónoma de Galicia.

Como integrantes da organización estatística de Galicia, o IGE e os órganos estatísticos sectoriais dos departamentos da Xunta de Galicia deben desenvolver as súas actuacións dentro do marco establecido pola normativa autonómica na materia, recollida na Lei 9/1988, do 9 de xullo, de estatística de Galicia e na Lei 16/2021, do 20 de decembro, do Plan galego de estatística 2022-2026.

Terceiro. De acordo co exposto, para optimizar a recollida e a elaboración da información, actuando baixo os principios que deben orientar a xeración de estatísticas públicas, particularmente os de adecuación dos recursos, comparabilidade e carga non excesiva para os informantes, a AMTEGA e o IGE acordan asinar un convenio de colaboración, que se rexerá polas seguintes

CLÁUSULAS

PRIMEIRA. OBXECTO

O obxecto do convenio é establecer as condicións polas que se rexerá a colaboración entre a AMTEGA e o IGE coas finalidades de:

I. Elaborar Indicadores sobre a sociedade da información nos ámbitos dos fogares e das empresas:

- No ámbito dos fogares, integrar os indicadores sobre sociedade información na Enquisa Estrutural a Fogares (en adiante EEF) do IGE, que se realizará a través de dúas vías:
 - Con carácter anual, recollerase na EEF un conxunto de indicadores.
 - Coa frecuencia que se acorde entre ambos organismos e cando menos cada cinco anos, recollerase información máis detallada nun módulo específico da EEF.
- No ámbito das empresas, aproveitar a información da Enquisa sobre o uso de TIC e no comercio electrónico nas empresas do Instituto Nacional de Estatística (en adiante INE). Este aproveitamento realizarase a través do IGE e o colectivo analizado incluírá as empresas con sede en Galicia e as sediadas fóra de Galicia con establecementos emprazados no seu territorio con máis de dez empregados. Así mesmo, a colaboración permitirá actualizar anualmente o sistema de indicadores da sociedade da Información de Galicia sempre que ditos indicadores estean recollidos na enquisa do INE.

II. Levar a cabo un mínimo de dúas enquisas sobre ciberseguridade nas empresas, para o que será necesario establecer de mutuo acordo unha planificación e unha metodoloxía que inclúa, cando menos, os obxectivos, o marco da investigación, os cuestionarios de recollida de información e o plan de difusión.





SEGUNDA. OBRIGAS DAS PARTES

2.1 Obrigas do IGE

No ámbito dos fogares, o IGE comprométese a:

- Incluir anualmente na EEF un conxunto de indicadores sobre penetración e uso das TIC nos fogares consensado coa AMTEGA:

[http://www.ige.eu/web/Controlador?
operacion=mostrarcuestionarios&tema=1030&actividad=11&idioma=ga](http://www.ige.eu/web/Controlador?operacion=mostrarcuestionarios&tema=1030&actividad=11&idioma=ga)

- Incluir na EEF, coa frecuencia que se acorde coa AMTEGA e cando menos cada cinco anos, un módulo específico sobre penetración e uso das TIC nos fogares, cuxo contido se convirá coa AMTEGA:

[http://www.ige.eu/web/Controlador?
operacion=mostrarcuestionarios&tema=2010&actividad=76&idioma=ga](http://www.ige.eu/web/Controlador?operacion=mostrarcuestionarios&tema=2010&actividad=76&idioma=ga)

- Entregar á AMTEGA os microdatos da EEF sobre indicadores TIC nos fogares nun prazo non superior a catro meses desde a publicación dos resultados do módulo xeral da enquisa. A achega de microdatos estará sometida á normativa estatística de Galicia sobre segredo estatístico.
- Entregar á AMTEGA unha explotación estatística inicial destes indicadores, atendendo ás variables acordadas previamente entre ambos organismos.
- Os resultados do módulo específico presentaranse por ambos organismos en data acordada. O mes de publicación recollerase no Programa estatístico correspondente e a data exacta de publicación determinarase con dous meses de antelación.

No ámbito das empresas, ademais de colaborar coa AMTEGA no deseño da enquisa sobre ciberseguridade, o IGE, en función dos compromisos que se derivan do convenio sobre cooperación estatística e intercambio de información asinado co INE, comprométese a:

- Obter os microdatos das empresas con actividade en Galicia da enquisa do INE sobre o uso de TIC e do comercio electrónico nas empresas.
- Explotar estatisticamente os microdatos cedidos polo INE, realizando un tratamento conxunto das empresas sediadas e non sediadas que permita analizar os resultados do colectivo con actividade empresarial en Galicia.
- Entregar á AMTEGA no marco temporal acordado as tabulacións correspondentes aos indicadores derivados da enquisa do INE.
- Entregar á AMTEGA no marco temporal acordado as tabulacións correspondentes aos indicadores das empresas multilocalizadas.
- Colaborar e asesorar no proceso de explotación dos datos subministrados á





AMTEGA.

- Realizar o deseño mostral, taballo de campo e posterior depuración da enquisa de ciberseguridade empregando o seu propio persoal enquisador, facilitando os microdatos a AMTEGA segundo o proxecto técnico acordado e o disposto sobre segredo estatístico.
- Realizar as actividades que se estimen oportunas e sexan aceptadas de mutuo acordo polas partes.

2.2. Obrigas da AMTEGA

A AMTEGA, a través do OSIMGA, comprométese a:

- Revisar co IGE os indicadores que figuren anualmente na EEF e periodicamente no seu módulo específico sobre penetración e uso das TIC nos fogares, para podermos adaptar aos cambios que marquen as tecnoloxías e as necesidades informativas na materia.
- Ofrecer asesoramento técnico ao IGE no relativo á terminoloxía e definicións vencelladas ás tecnoloxías da información e da comunicación.
- Actualizar o sistema de indicadores da sociedade da información de Galicia empregando como fontes de información a EEF do IGE e a "Enquisa sobre o uso de TIC e comercio electrónico nas empresas" do INE.
- Completar a explotación estatística dos microdatos sobre as TIC incluídos na EEF.
- Demandar do IGE a explotación estatística dos microdatos da enquisa do INE correspondentes ás empresas multilocalizadas, realizando un tratamento conxunto coas sediadas en Galicia, para obter un resultado global que permita analizar as empresas con actividade empresarial na Comunidade Autónoma.
- Difundir os resultados dos indicadores na web do OSIMGA: www.osimga.gal
- Realizar as actividades relacionadas co obxecto do convenio que se estimen oportunas e sexan aceptadas de mutuo acordo polas partes e colaborar co IGE no deseño dunha enquisa sobre ciberseguridade nas empresas.

2.3 A AMTEGA e o IGE incluírán as actuacións derivadas deste convenio nos programas estatísticos anuais da Comunidade Autónoma.

TERCEIRA. FINANCIAMENTO

As actuacións previstas neste convenio non xerarán custos nin darán lugar a contraprestacións financeiras entre as partes asinantes.

CUARTA. VIXENCIA





Este convenio empezará a producir efectos a partir do día seguinte ao da súa sinatura, tomando como data de referencia a da derradeira sinatura, e terá unha vixencia e catro anos. No entanto, antes de rematar o prazo previsto e se as circunstancias o aconsellan, as partes poderán acordar por unanimidade a súa prórroga polo período estritamente necesario e sempre dentro do límite máximo de catro anos adicionais establecido na Lei 40/2015, de 1 de outubro, de réxime xurídico do sector público.

QUINTA. MODIFICACIÓN

Este convenio poderase modificar por acordo das partes, por proposta de calquera delas e subscribindo a oportuna addenda de modificación, formalizada durante o seu período de vixencia.

SEXTA. CAUSAS DE RESOLUCIÓN

Serán causa de resolución do convenio:

- O transcurso do prazo de vixencia sen que se acorde a súa prórroga.
- O transcurso do prazo máximo de vixencia, incluído o período de prórroga establecido.
- O acordo unánime dos asinantes.
- O incumprimento das obrigas e dos compromisos asumidos por algunha das partes.
- A decisión xudicial declaratoria da súa nulidade.

No caso de resolución do convenio por calquera causa prevista no mesmo, ou na Lei, a comisión de seguimento e coordinación prevista na cláusula seguinte, fixará o prazo para finalizar as actuacións derivadas do mesmo que estean en execución, prazo que será improrrogable.

SÉTIMA. COMISIÓN DE SEGUIMENTO E COORDINACIÓN

Para analizar, concretar e desenvolver as iniciativas contempladas neste convenio, as partes acordan crear unha comisión de seguimento e coordinación formada por tres persoas en representación da AMTEGA e por tres persoas en representación do IGE.

a) Formarán parte de comisión representando á AMTEGA

- A persoa titular da Dirección da Área de Sociedade Dixital, ou persoa que a substitúa
- A persoa titular do departamento de Sociedade e Talento Dixital, ou persoa que a substitúa
- A persoa titular do departamento de Innovación Dixital e Intelixencia Artificial, ou persoa que a substitúa

b) Formarán parte da comisión representando ao IGE:





- A persoa titular da Subdirección de Produción Estatística, ou persoa que a substitúa
- A persoa titular do Servizo de Estatísticas Sociais, ou persoa que a substitúa
- A persoa titular do Servizo de Estatísticas de Empresas, ou persoa que a substitúa

Serán funcións da comisión:

- Velar polo cumprimento do convenio.
- Concretar, seguir, interpretar e avaliar as accións derivadas do convenio.
- Adoptar ou propor as medidas necesarias para garantir o exercicio coordinado das competencias de cada unha das partes.
- Resolver os problemas de interpretación e cumprimento que poidan xurdir.
- En xeral, as que a Lei 40/2015, do 1 de outubro, de réxime xurídico do sector público lle atribúe aos órganos de vixilancia e control.

A comisión reunirse sempre que o requira unha das partes, con previo aviso á outra cunha semana cando menos de antelación.

OITAVA. NATUREZA, RÉXIME XURÍDICO E RESOLUCIÓN DE CONFLICTOS

O presente convenio ten natureza administrativa, e rexerese polas normas de dereito administrativo aplicable.

En especial, o convenio queda suxeito ao Capítulo VI, da Lei 40/2015, do 1 de outubro, de réxime xurídico do sector público e ao resto da normativa que resulte aplicable.

As controversias que puidesen xurdir sobre a interpretación e execución do convenio deberán resolverse de mutuo acordo entre as partes, no seo da Comisión de Seguimento prevista na cláusula sétima.

As discrepancias que poidan xurdir e que non poidan ser resoltas no seo da Comisión de Seguimento resolveranse nos termos previstos no artigo 18 da Lei 14/2013, do 26 de decembro, de racionalización do sector público autonómico e no artigo 13 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, para os conflitos de atribucións.

NOVENA. PROTECCIÓN DE DATOS

As partes comprométense a cumprir co disposto na Lei Orgánica 3/2018, do 5 de decembro, de protección de datos persoais e garantía dos dereitos dixitais, que supón adaptar a normativa española ao Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos, e polo que se derroga a Directiva 95/46/CE (Regulamento xeral de protección de datos).

As partes comprométense tamén a respectar as normas sobre segredo estatístico reguladas na Lei 9/1988, do 19 de xullo, de estatística de Galicia.





DÉCIMA. PUBLICIDADE E REXISTRO

O presente convenio será inscrito no rexistro de Convenios da Xunta de Galicia, nos termos previstos no Decreto 126/2006, do 20 de xullo.

As partes asinantes autorizan/consenten na publicidade dos seus datos persoais e demais especificacións recollidas no presente instrumento de colaboración no Portal de Transparencia e Goberno Aberto

Segundo o artigo 17 da Lei 1/2016, do 18 de xaneiro, de transparencia e bo goberno, ademais da información que debe facerse pública segundo a normativa básica en materia de transparencia, publicarase o texto íntegro do convenio.

E, en proba de conformidade cos termos do convenio, asínano

O Director da Axencia para a
Modernización Tecnolóxica de Galicia

Julián Cerviño Iglesia

O Director do Instituto Galego de
Estatística

José Antonio Campo Andión

